



Fundasaun Mahein (FM), 26 Marsu 2020

Komunikadu Imprensa

Timor-Leste: Covid-19 no Estadu de-Emerjensia

Organizasaun Mundial ba Saúde (OMS) hato'o Coronavirus (Covid-19) hanesan ameasa pandemia no daet ona ba nasaun, teritoriu no area hamutuk 196. Dadus ikus liu loron 25 Marsu 2020 rejista kazu Covid-19 hamutuk 416,686 no hamate ona ema 18,589 iha nasaun, teritoriu no area sira ne'ebé afeta husi Covid-19. Timor-Leste iha loron 21 Marsu 2020 relatóriu husi Ministériu Saúde hato'o rejista kazu dahuluk Covid-19 no relatóriu *dashboard* husi OMS konfirma kona-bá kazu ne'e.

Timor-Leste, iha loron 23 Marsu 2020 Sorumutu Estrordináriu Konsellu Ministru aprova pedidu ka proposta deklarasaun estadu de-emerjensia no hato'o ona ba Prezidente Repúblika Francisco Guterres "Lu-Olo". Proposta ne'e ninia objetivu atu aseguira ba Governu meu legal hirak ne'ebé nesesariu atu interven lalais hodi prevene surtu Coronavirus foun mosu tan iha Timor-Leste, no karik surtu ne'e akontese duni, foti medida hirak ne'ebé presiza no adekuaudu hodi kombate virus ne'e atu labele daet habelar.

Nune'e, iha loron 24 Marsu 2020 Prezidente Repúblika konvoka kedas enkontru ho karakter urjente ho Konsellu Estadu no Konsellu Superior Defeza no Seguransa no fó opiniaun favoravel katak presiza duni deklara Estadu Emerjensia no hato'o mensajen no husu Parlamentu Nasional nia autorizasaun.

Tuir artigu 25 Konstitusaun Repúblika Demokrátika Timor-Leste, estadu de-sítu ka estadu de-emerjensia bele deklara "bainhira iha forsa estranjeira nia agresaun efetivu ka iminente, perturbasaun maka'as ka ameasa atu iha perturbasaun maka'as ba orden konstitusional demokrátika ka kalamidade públika". Iha kazu Coronavirus (Covid-19), ida ne'e sei sai emerjensia ka krize ba saúde públika no hamosu ameasa kalamidade públika. Iha situasaun ne'e, bele deklara estadu de-emerjensia. Portantu estadu de-emerjensia bele deklara iha situasaun sira ne'ebé menor gravidade no determina suspensaun parsial ba direitu, liberdade no garantia sira.

Nune'e, suspensaun parsial ba direitu, liberdade no garantia sira ne'ebé Governu propoin ba Prezidente hodi deklara estadu de-emerjensia maka iha possibilidade atu aplika, inklui limitasaun ba ema atu sai ba mai, hala'o atividade públika no privada sira ne'ebé la esensial, halibur-malu, halo manifestasaun ka selebrasaun relijioza no kuarentena obrigatóriu iha uma, ka iha facilidade saúde nian sira.

Governu fundamenta katak deklarasaun estadu de-emerjensia hanesan meu legal ne'ebé nesesariu atu aseguira Governu interven lalais hodi prevene surtu Coronavirus foun mosu tan iha Timor-Leste, no karik surtu ne'e akontese duni, foti

medida hirak ne'ebé presiza no adekuaudu hodi kombate virus ne'e atu la bele daet habelar.

Nune'e, atu jere situasaun krize hanesan kalamidade pública, Sentru Integradu Jestaun ba Krize bele funsiona nu'udar fatin ba situasaun iha kazu sira hanesan esepasaun konstitusional tuir termu sira hakerek ona iha lejislasaun ne'ebé regula Estadu de-sítu ka Estadu de-emerjensia. Iha situasaun ne'e Sentru Integradu Jestaun ba Krize haksoit kedas ba dependensia Primeiru-Ministru nian, nune'e bele funsiona nu'udar fatin situasaun nian

Rekomendasaun

Governu propoin ba Prezidente Repúblika kona-bá deklarasaun estadu de-emerjensia iha situasaun krize saúde pública Coronavirus (Covid-19), ne'ebé daudaun ne'e sai ameasa ba Timor-Leste no bele hamosu kalamidade pública, bele deklarasaun estadu de-emerjensia. Nune'e atu jere krize ida ne'e, FM rekomenda Sentru Integradu Jestaun ba Krize nu'udar fatin ba situasaun estadu de-emerjensia nian. Nune'e mos suspensaun ba direitu, liberdade no garantia sira tenke haree didiak entre asesu ba nesesidade báziku sira husi komunidadade iha fatin ne'ebé konsentrasaun ho ema barak no medida prevesaun Covid-19 ne'ebé sujere la bele konsentra ema barak no kontaktu direta sira.

Atu hetan informasaun kle'an liu kona-bá asuntu ne'e bele kontaktu:

João Almeida

Acting Director

Email: almeidamahein@gmail.com

Telemovel: (+670) 7756 1184

Website: www.fundasaunmahein.org